



Llywodraeth Cymru
Welsh Government

Gwybodaeth i Ymgeiswyr

Cyngor Cyllido Addysg Uwch Cymru

Penodi Aelodau



GWYBODAETH I YMGEISWYR

Cefndir

Mae Cyngor Cyllido Addysg Uwch Cymru ("CCAUC" neu "y Cyngor") yn gorff a noddir gan Lywodraeth Cymru a sefydlwyd ym mis Mai 1992 o dan Ddeddf Addysg Bellach ac Addysg Uwch 1992 ("Deddf 1992").

Mae'r Cyngor yn gyfrifol am ariannu addysg uwch yng Nghymru ac mae'n gweinyddu'r cyllid a ddarperir gan Lywodraeth Cymru er mwyn cefnogi addysg, ymchwil a gweithgareddau cysylltiedig mewn prifysgolion yng Nghymru ynghyd ag addysgu gan y Brifysgol Agored yng Nghymru. Mae hefyd yn darparu cyllid ar gyfer cyrsiau addysg uwch penodol mewn colegau addysg bellach. Mae CCAUC hefyd yn gyfrifol am fynd i'r afael ag agweddau ar gymorth i fyfyrwyr.

Y Cyngor sydd hefyd yn gyfrifol am ariannu cyrsiau hyfforddi athrawon ac am achredu darparwyr hyfforddiant cychwynnol athrawon yng Nghymru. Caiff y cyfrifoldebau hyn eu cynnwys yn Rheoliadau Addysg (Cymwysterau Athrawon Ysgol) (Cymru) 2012 ac yn Neddf Addysg 2005.

Mae Adroddiad Blynyddol y Cyngor ar gyfer 2011-12, y Cynllun Corfforaethol ar gyfer 2013-14 hyd 2015-16, ynghyd â llythyr cylch gwaith Llywodraeth Cymru ar gyfer 2014-15 ar gael ar wefan CCAUC <http://www.hefcw.ac.uk>. Gallwch weld datganiad Polisi Llywodraeth Cymru ar addysg uwch yn <http://www.wales.gov.uk/http://wales.gov.uk/topics/educationandskills/highereducation/policy-statement/?sessionId=32D5EEBD2A950D94B2E96420BC880FB6?lang=cy>

Rôl y Cyngor

Nod y Cyngor yw datblygu a chynnal addysg uwch rhagorol ar lefel ryngwladol yng Nghymru, er lles unigolion, y gymdeithas a'r economi yng Nghymru a thu hwnt.

Prif dasg y Cyngor ar hyn o bryd yw dyrannu cyllid gan Lywodraeth Cymru ar gyfer darparu addysg ac ymgymryd ag ymchwil gan sefydliadau addysg uwch (SAU) yng Nghymru. Mae gan CCAUC gyllideb o oddeutu £362 miliwn ar gyfer 2014-15. Mae telerau ac amodau ynghlwm wrth y grantiau a ddarperir i'r Cyngor gan Lywodraeth Cymru, ac mae'n rhaid i'r Cyngor gydymffurfio â hwy, fel yr amlinella'r Llythyr Cylch Gwaith ar gyfer 2014-15. Eto i gyd, bydd y Bil Addysg Uwch sydd gerbron Cynulliad Cenedlaethol Cymru ar hyn o bryd yn newid rôl y Cyngor i rôl rheoleiddio, a fydd yn golygu newidiadau sylweddol i'r modd y mae'r Cyngor yn mynd i'r afael â'i ddyletswyddau. Golyga hyn ddatblygu dulliau eraill o gyflawni blaenoriaethau Llywodraeth Cymru.

Mae'r Cyngor yn darparu cyngor arbenigol ac mae'n benodol gyfrifol am asesu ansawdd. Mae'r Prif Weithredwr yn cyflawni rôl Swyddog Cyfrifyddu er mwyn rheoli'r cyllid a ddarperir gan Lywodraeth Cymru.

Mae'r diwygiadau i gyllid myfyrwyr ac addysg uwch a gyhoeddwyd yn 2010 ynghyd â datganiad polisi Llywodraeth Cymru ar addysg uwch yn amlinellu gweledigaeth newydd ar gyfer dyfodol addysg uwch yng Nghymru. Bydd Llywodraeth Cymru yn gweithio mewn partneriaeth â darparwyr Addysg Uwch a CCAUC er mwyn cyflawni'r

Cyngor Cyllido Addysg Uwch Cymru

uchelgais a rennir ar gyfer system addysg uwch o'r radd flaenaf ar gyfer dysgwyr yng Nghymru a'r genedl ei hun yn yr unfed ganrif ar hugain.

Mae Strategaeth Gorfforaethol CCAUC (2013-14 hyd 2015-16) yn nodi'r themâu strategol allweddol y mae angen i'r Cyngor eu hystyried dros y tair blynedd nesaf. Gweledigaeth y Cyngor ar gyfer y dyfodol yw addysg uwch o'r radd flaenaf ar lefel ryngwladol yng Nghymru sy'n gynaliadwy ac yn gwbl hygyrch.

Nod y Cyngor yw:

- sicrhau profiad rhagorol ac o'r radd flaenaf ar gyfer myfyrwyr addysg uwch ynghyd ag ymchwil rhagorol o safon ryngwladol;
- hybu cyfraniad addysg uwch yng Nghymru, y DU ac yn rhyngwladol;
- galluogi darparwyr addysg uwch i gyflawni blaenoriaethau Llywodraeth Cymru a blaenoriaethau'r DU ar gyfer addysg uwch;
- hysbysu a llywio polisi'r Llywodraeth er mwyn sicrhau ei fod yn berthnasol ac yn briodol i'w gyflenwi gan ddarparwyr addysg uwch;

er mwyn:

- gwella cyfiawnder cymdeithasol;
- sicrhau economi sy'n ffynnu.

Nodau Strategol

Nodau strategol y Cyngor wrth gyflawni ei gyfrifoldebau yw:

- **EHANGU MYNEDIAD** – sicrhau cynhwysiant, cynnydd a llwyddiannau ym maes addysg uwch;
- **PROFIAD MYFYRWYR** – sicrhau addysg uwch a phrofiadau o'r radd flaenaf ar gyfer myfyrwyr, gan sicrhau gwell llais i fyfyrwyr;
- **SGILIAU, CYFLOGADWYEDD a MENTERGARWCH** – sicrhau graddedigion sy'n barod ar gyfer bywyd a gwaith, ynghyd â phrifysgolion sy'n cyfrannu at weithlu mwy medrus;
- **ARLOESI AC YMGYSYLLTU** – sicrhau bod gwybodaeth yn cael ei chymhwyso a'i defnyddio er mwyn cyflawni cyfiawnder cymdeithasol ac economi lewyrchus;
- **YMCHWIL** - sicrhau ymchwil o safon ryngwladol er mwyn cyflawni economi lewyrchus a chefnogi cyfiawnder cymdeithasol.

Bydd yr egwyddorion allweddol canlynol hefyd yn sail i waith y Cyngor:

- **AD-DREFNU A CHYDWEITHREDU** – cyflawni system addysg uwch o'r newydd gyda darparwyr cadarn a fydd yn cynnig cyfleoedd addysg uwch mwy hygyrch, drwy waith partneriaeth, ac yn arbennig ar lefel ranbarthol. Bydd hefyd yn cynnig cyfleoedd addysg uwch mwy hygyrch a gwell darpariaeth o safbwynt Addysg Uwch ar draws Cymru;
- **LLYWODRAETHU** – cyflawni gwelliannau parhaus o ran safon llywodraethu a chynaliadwyedd hirdymor y system addysg uwch;
- **EFFEITHIOLRWYDD TREFNIADOL** - bod yn sefydliad cost effeithiol sy'n cael ei redeg yn dda ac a fydd yn cydweithio mewn modd adeiladol â Llywodraeth Cymru a darparwyr addysg uwch, yn unigol ac ar y cyd.

Cyngor Cyllido Addysg Uwch Cymru

Disgrifiad o'r rôl

Disgwylir i'r Aelodau:

- gydweithio'n agos â'r Cadeirydd ac â'r Prif Weithredwr wrth roi cyngor ac anogaeth i CCAUC wrth ysgogi, datblygu a gweithredu polisi ac wrth gyflawni'r cyfrifoldebau statudol;
- mynychu cyfarfodydd y Cyngor a bydd disgwyl iddynt hefyd gyfrannu at benderfyniadau allweddol ynghylch strategaeth y Cyngor;
- darparu cyngor awdurdodol ac amserol i Lywodraeth Cymru, ar lefel gyfyngedig, rhwng cyfarfodydd;
- cadeirio pwyllgorau'r Cyngor, neu fod yn aelodau ohonynt, fel y bo angen;
- cynnal, a hynny'n amlwg, y safonau uchaf posibl o ran uniondeb a didueddrwydd;
- ennyn parch tuag at waith y Cyngor
- gallu ymdrin yn hyderus â Llywodraeth Cymru ac â'r sector addysg uwch yng Nghymru.

Manyleb y Person

Wrth benodi Aelodau'r Cyngor, mae gofyn i Weinidogion Cymru, o dan adrannau 62(4) o Ddeddf 1992:

(a) ystyried dymunoldeb cynnwys personau yr ymddengys fod ganddynt brofiad o ddarparu addysg uwch, ac sydd wedi dangos capasiti i wneud hynny, neu sydd wedi meddu ar unrhyw swydd lle roedd cyfrifoldeb am ddarparu addysg uwch, ac wedi dangos capasiti i wneud hynny. Wrth benodi personau o'r fath, bydd gofyn ystyried dymunoldeb y ffaith eu bod eisoes yn ymwneud â darparu addysg uwch neu'n meddu ar gyfrifoldeb am ddarpariaeth o'r fath, ac

(b) ystyried dymunoldeb cynnwys personau yr ymddengys fod ganddynt brofiad o faterion diwydiannol, masnachol neu ariannol, ac sydd wedi dangos capasiti i wneud hynny, neu sy'n arfer unrhyw broffesiwn'.

Bydd y Gweinidog yn ystyried y gofynion hyn wrth benodi aelodau i'r Cyngor. Bydd angen i chi ddangos:

- Eich bod yn ymwybodol o'r ffaith bod y sector addysg uwch yn newid a dylech hefyd ddeall yr heriau y mae'n eu hwynebu o fewn y DU ac yn rhyngwladol;
- Eich bod yn gallu herio syniadau cyfredol a chyfathrebu'n effeithiol ac mewn modd argyhoeddiadol;
- Eich bod yn gallu bod yn aelod effeithiol o fwrdd;
- Dealltwriaeth glir o faterion cydraddoldeb ac ymrwymiad iddynt, a'r gallu i herio arferion gwahaniaethol lle bo hynny'n briodol

Cyngor Cyllido Addysg Uwch Cymru

- Dealltwriaeth o bwysigrwydd safonau uchel mewn bywyd cyhoeddus.

Mae Llywodraeth Cymru'n awyddus iawn i gynnwys aelodau sy'n meddu ar brofiad helaeth yn un neu fwy o'r meysydd canlynol:

- profiad o fewn Sefydliadau Addysg Uwch sy'n ymgymryd â llawer o waith ymchwil;
- profiad o fewn busnes sy'n rhan o'r sector preifat ac sy'n ymwneud yn benodol â gwybodaeth ynghyd â phrofiad o recriwtio graddedigion.
- profiad o reoli/gweithredu newidiadau sefydliadol.

Ni chaiff ymgeisydd llwyddiannus sy'n gweithio i sefydliad addysg uwch yng Nghymru ar hyn o bryd, neu sydd wedi gweithio i sefydliad o'r fath, gynrychioli buddiannau'r sefydliad hwnnw tra'n aelod o'r Cyngor, ond bydd disgwyl iddo/iddi fynegi barn ddiduedd a holistaidd ynghylch yr heriau y mae pob rhan o'r sector addysg uwch yng Nghymru yn eu hwynebu.

Wrth wneud penderfyniadau terfynol ynghylch aelodaeth, bydd y Gweinidog Addysg a Sgiliau yn ceisio sicrhau Cyngor cwbl gytbwys sy'n adlewyrchu'r heriau amrywiol y mae addysg uwch yng Nghymru yn eu hwynebu.

Pwy sy'n gymwys i wneud cais

Dylai'r ymgeiswyr fod yn bobl sy'n ymddwyn mewn modd a fydd yn ennyn hyder y cyhoedd ar bob adeg.

Dylai ymgeiswyr hefyd nodi bod derbyn swydd aelod o CCAUC sy'n derbyn tâl yn golygu na allant fod yn aelodau o Dŷ'r Cyffredin o dan Ddeddf Anghymhwysio Tŷ'r Cyffredin 1975, Atodlen 1, Rhan III nac o Gynulliad Cenedlaethol Cymru o dan Orchymyn Cynulliad Cenedlaethol Cymru (Anghymhwysio) 2010.

Aelodaeth

O dan Ddeddf 1992, caiff y Cyngor ei arwain gan Gadeirydd ac mae'n cynnwys rhwng 8 a 12 o aelodau, sy'n cynnwys y Cadeirydd a'r Prif Weithredwr.

Cadeirydd

Cadeirydd presennol CCAUC yw Mr David Allen OBE.

Yr Ysgrifenyddiaeth

Tîm Gweithredol CCAUC yw ysgrifenyddiaeth y Cyngor.

Telerau'r Penodiad

Caiff y penodiadau eu gwneud gan y Gweinidog Addysg a Sgiliau ar ran Gweinidogion Cymru.

Cyngor Cyllido Addysg Uwch Cymru

Hyd y Penodiad

Bydd y penodiadau yn para i ddechrau am gyfnod o 3 blynedd. Os ceir adolygiad boddhaol, mae'n bosibl y caiff penodiadau eu hadnewyddu am gyfnod o hyd at 10 mlynedd.

Ymrwymiad amser

Bydd disgwyl i'r Aelodau fod ar gael i weithio am o leiaf 1.5 diwrnod y mis gan y bydd CCAUC yn cyfarfod o leiaf 6 gwaith y flwyddyn.

Lleoliad y Cyfarfodydd

Caiff cyfarfodydd y Cyngor eu cynnal yng Nghaerdydd gan amlaf, ond gallai cyfarfodydd gael eu cynnal mewn gwahanol leoliadau ar draws Cymru o bryd i'w gilydd.

Cyflog

Bydd yr Aelodau'n derbyn tâl o £5,076 y flwyddyn. Ystyrir bod aelodau'n ddeiliaid swydd at ddibenion treth ac Yswiriant Gwladol. Bydd y ffioedd a delir, o ganlyniad, yn drethadwy o dan Atodlen E y Ddeddf Drethi ac yn destun cyfraniadau Dosbarth 1 Yswiriant Gwladol. Caiff y rhwymedigaethau hyn eu tynnu drwy system gyflogres CCAUC a chaiff y ffi net ei dalu i ddeiliad y swydd. Ni fydd yn rhaid talu TAW ar y ffioedd.

Gellir hawlio costau teithio ac unrhyw gostau rhesymol eraill a ysgwyddir wrth gyflawni swyddogaethau ar ran y Cyngor, o fewn y terfynau cydnabyddedig. Mae'n bosibl y byddwch hefyd yn gymwys i hawlio ad-daliad am unrhyw gostau y mae'n rhaid i chi eu talu am ofal plant / gofal i'r henoed neu am wasanaeth gofalwr cynorthwyol tra'ch bod yn gweithio ar ran y Cyngor.

Cymorth i Aelodau Anabl

Lle bo hynny'n briodol, caiff pob addasiad rhesymol ei wneud er mwyn i'r aelodau fedru cyflawni eu dyletswyddau'n effeithiol.

Hyfforddiant Cynefino

Bydd gofyn i'r ymgeiswyr llwyddiannus fynychu sesiynau cynefino a gynhelir yn fuan ar ôl eu penodi.

Y Broses Ddethol

Rheoleiddir y penodiad hwn gan y Comisiynydd Penodiadau Cyhoeddus ac fe'i gwneir yn unol â Chod y Comisiynydd ar Benodiadau gan Weinidogion i Gyrff Cyhoeddus. Mae'n bolisi gan Lywodraeth Cymru i hyrwyddo cyfle cyfartal a'i ymgorffori ym mhob agwedd ar ei gwaith gan gynnwys penodi i gyrff cyhoeddus. Croesewir ac anogir ceisiadau gan bob grŵp ac rydym yn sicrhau na fydd unrhyw ymgeisydd cymwys am swydd gyhoeddus yn cael ei drin yn llai ffafriol ar sail oedran, anabledd, rhyw, statws priodasol, cyfeiriadedd rhywiol, ailbennu rhywedd, hil, crefydd

Cyngor Cyllido Addysg Uwch Cymru

neu ymlyniad crefyddol neu feichiogrwydd a mamolaeth. Rydym yn croesawu'n benodol geisiadau gan grwpiau sy'n cael eu tangynrychioli ar hyn o bryd mewn penodiadau cyhoeddus fel menywod, pobl anabl a lleiafrifoedd ethnig. Cedwir at yr egwyddor o gystadleuaeth deg ac agored a phenodir ar sail teilyngdod.

Dyddiad dechrau

Caiff yr Aelodau eu penodi o fis Ebrill 2015.

Rhagor o Wybodaeth ac Ymholiadau

I gael rhagor o wybodaeth am y broses ymgeisio, ac i wneud cais, ewch i www.cymru.gov.uk/penodiadaucyhoeddus neu os oes gennych unrhyw ymholiadau cysylltwch â Desg Gymorth Adnoddau Dynol ar 029 2082 5454 / hr-helpdesk@wales.gsi.gov.uk.

I gael rhagor o wybodaeth am CCAUC gallwch ymweld â'i wefan: www.hefcw.ac.uk, neu gysylltu â Chlerc y Cyngor ar 029 2068 2252.

Ceisiadau

Dylech gyflwyno cais drwy lenwi'r ffurflen gais ar-lein. Mae'r Nodiadau Cyfarwyddyd i Ymgeiswyr yn rhoi canllawiau manwl ar sut i lenwi'r ffurflenni cais a monitro.

Gobeithio y bydd y broses ar-lein yn un syml ichi ei dilyn, ond rydym yn sylweddoli na fydd pawb yn gallu ei defnyddio oherwydd problemau mynediad. Rydym yn eich annog i wneud eich cais ar-lein, ond os na allwch wneud hynny, cysylltwch â Llinell Gymorth Adnoddau Dynol ar 029 2082 5454, a byddant yn gallu darparu copi o'r pecyn cais ar fformat arall.

Gwybodaeth bwysig am ddefnyddio'r system ymgeisio ar-lein

Wrth ddefnyddio'r system ymgeisio ar-lein, dylech ddarllen y dudalen "Help a Chyfarwyddiadau" sy'n ymddangos fel opsiwn ar dudalen gyntaf y ffurflen gais, ar ôl y dudalen mewngofnodi. Mae'r cyfarwyddiadau yn tynnu sylw at ba mor bwysig yw defnyddio'r botwm "Cadw ac Ymlaen" ar waelod y dudalen i gadw unrhyw wybodaeth yr ydych wedi'i chofnodi ar y ffurflen.

Mae hyn yn arbennig o bwysig pan fyddwch yn llenwi'r rhan ar dystiolaeth o'ch addasrwydd i gael eich penodi. Mae'n syniad da clicio ar "Cadw ac Ymlaen" ar ôl llenwi pob cwestiwn yn y rhan hon er mwyn sicrhau na chaiff unrhyw wybodaeth ei cholli. Gallwch fynd yn ôl i'r rhan ar dystiolaeth o'ch addasrwydd i gael eich penodi ar ôl clicio ar "Cadw ac Ymlaen" drwy ddefnyddio'r ddewislen ar ochr chwith y dudalen.

Nodyn o rybudd - os byddwch yn clicio ar y botwm "Ailosod Tudalen", byddwch yn colli'r holl wybodaeth sydd wedi'i chofnodi gennych ar y ffurflen ers y tro diwethaf i chi glacio ar "Cadw ac Ymlaen".

Cyngor Cyllido Addysg Uwch Cymru

Dyddiad Cau

Y dyddiad cau ar gyfer derbyn ceisiadau yw **12 Rhagfyr 2014**. Ni fyddwn yn ystyried ffurflenni cais a ddaw i law ar ôl y dyddiad hwnnw. Rhagwelir y bydd cyfweiliadau'n cael eu cynnal yn ystod yr wythnos yn cychwyn ar 16 Chwefror 2015.